

# Radiukkut tv-kkullu aallakaatitsisarneq pillugu Inatsisartut Inatsisaat

## Kapitali 1

### *Aallakaatitassiorsinnaatitaaneq*

§ 1. Uku § 2-mi taaneqartunik aallakaatitassiornissamut pisinnaatitaapput:

1) Kalaallit Nunaata Radioa (KNR), tak. kapitali 4.

2) Ingerlatseqatigiiffiit, peqatigiiffiit assigisaallu kiisalu kommunit kapitali 3 malillugu aallakaatitsisinaanermut akuersisummik tunineqarsimasut.

*Imm. 2.* Inatsisartut inatsisaat aammalu Inatsisartut inatsisaat naapertorlugu aalajangersakkat atuutilersinneqarsimasut kiisalu aallakaatitsisinaanermut akuersisummik tunineqarnermi piumasaqaatitut nalunaarutigineqarsimasinnaasut naapertorlugit aallakaatitassiorortoqartassaaq.

§ 2. Aallakaatitassiorneq imatut paasineqassaaq:

1) Radioqarfiit aqutugalugit tusarnaagassianik isiginnaagassianillu inunnut tamanut aallakaatitsineq.

2) Tusarnaagassianik isiginnaagassianillu nr. 1-imil ilanngullugit taaneqanngitsunik antenneqarfiit ataatsimoorussat iluaqutugalugit siammarterinerit.

*Imm. 2.* Inatsisartut inatsisaanni matumani radioqarfinnik oqarnermi pineqarput radiukkut attaveqarnermut atortut silaannakkoortut suulluunniit.

*Imm. 3.* Inatsisartut inatsisaanni matumani antenneqarfinnik ataatsimoorussanik oqarnermi pineqarput antenneqarfiit ataatsimoorussat kabeleqarfillu allat aallakaatitassianik tusarnaagassianik isiginnaagassianillu ineqarfinnut namminerisamik najugaqarfiusunut inunnut tamanut siammarterinerimut atortut.

*Imm. 4.* Inatsisartut Inatsisaanni matumani kabeleqarfinnik oqarnermi pineqarput kabelit aqutugalugit nalunaarasuartaatitugit attaveqatigiinnermut atortut.

§ 3. Nalunaarasuartaatitugit attaveqarneq sullissinerlu pillugit Inatsisartut peqqussutaat naapertorlugu tamanut ammasumik nalunaarasuartaatitugit sullissinerimut atortorisanik ingerlatsinermillu kiisalu tamakku suliariumannittussarsiorsinnaanerimut kisermaassisinnaanermik akuersissuteqartup, teknikkikkut atortunik KNR-ip § 2, imm. 1 naapertorlugu tusarnaagassianik isiginnaagassianillu inunnut tamanut aallakaatitsisarnermini pisariaqartitaanik, KNR-mik isumaqatigiissutit malillugit pilersissavai, atortunillu ingerlatsineq isumagissallugu.

*Imm. 2.* Atortunik imm. 1-imil taaneqartunik ikkussuinerimut ingerlatsinernullu piumasaqaatit aalajangersarneqassapput akuersisummik pigisaqartup Naalakkersuisullu isumaqatigiissusiornerisigut,

## Kapitali 2

### *Tusarnaagassianik isiginnaagassianillu siammarterineq*

*TV-kkut aallakaatitsissutaasinnaasut digitaliusut iluaqutigalugit tusarnaagassianik isiginnaagassianillu siammarterineq*

**§ 4.** Tusarnaagassianik isiginnaagassianillu Kalaallit Nunaanneersunik nunanillu allaneersunik aallakaatitsissutit digitaliusut iluaqutigalugit nuna tamakkerlugu siammarterineq taamaallaat Naalakkersuisut akuersissuteqarnerisigut pisinnaavoq.

*Imm. 2.* Naalakkersuisut akuersissummik tunniussinerminnut atatillugu akuersissummut piumasaqaatinik aalajangersaasinnaapput.

*Imm. 3.* Akuersissuteqarnermut akitsuuteqartitsinissaq Naalakkersuisut piumasarisinnaavaat.

*Imm. 4.* Naalakkersuisut akuersissummik atorunnaarsitsisinnaapput akuersissummik piginnittup

1) Inatsisartut inatsisaat imaluunniit aalajangersakkat inatsit naapertorlugu aalajangersarneqarsimasut unioqqutippagit, unioqqutitsineq annertuppat unioqqutitsinerilluunniit qasseeriarluni akuttunngitsumik pippata, imaluunniit

2) akuersissuteqarnermi piumasaqaatigineqartut sumiginnarpagit.

*Imm. 5.* Tusarnaagassianik isiginnaagassianillu Kalaallit Nunaanneersunik nunanillu allaneersunik aallakaatitsissutit digitaliusut iluaqutigalugit nuna tamakkerlugu siammarterinerimut akuersissummik tunniussisarneq pillugu maleruagassanik Naalakkersuisut aalajangiisinnaapput.

### *Antenneqarfinni ataatsimoorussani tusarnaagassianik isiginnaagassianillu siammarterisarneq*

**§ 5.** Tusarnaagassianik isiginnaagassianillu Kalaallit Nunaanneersunik nunanillu allaneersunik aallakaatitanik, antenne atorlugu tigooqqarneqartunik, imaluunniit kabeleqarfiit aqqutigalugit tigooqqarneqartunik, ingerlatitseqqiineq taamaallaat pissaaq allannguuteqartinnagit aallakaatitsinerullu peqatigisaanik.

*Imm. 2.* Taamaattorli allagartalersuineq assigisaannillu iliuuseqarnerit, nipi assilissallu atorlugit aallakaatinneqartup imaanik allanngortitsinngitsut, kiisalu piffissakkut allakkut aallakaatitsinerit pisinnaapput radiukkut imaluunniit tv-kkut aallakaatitassiorfik pineqartoq akuersisimappat.

**§ 6.** Antenneqarfinnik ataatsimoorussanik piginnittut pisussaapput tusarnaagassiat isiginnaagassiallu radioqarfiit aqqutigalugit KNR-imit siammarterneqartut siaruarternissaat qulakkiissallugu. Tamatumani pineqanngillat aallakaatitassiat § 29, imm. 1, naapertorlugu aallakaatinneqartut. Pisussaaffik aamma atuutinngilaq KNR-ip aallakaatitai antenneqarfinnik ataatsimoorussanik atuisunit allatut tigoorarneqarsinnaappata.

*Imm. 2.* KNR-imit aallakaatitassiat digitaliusut taamaallaat siaruarterneqassapput aallakaatitassiat digitaliusut allat antenneqarfimmi siaruarterneqarpata. KNR-imit aallakaatitassiat digitaliusut allanngortinneqarnissaat inerteqqutaavoq, ilutigitillugu aallakaatitassiat assingi digitaliusumik siaruarterneqanngippata.

**§ 7.** Ataatsimoorussamik antenneqarfiit marlunnit amerlanerusunik kanaleqarpata aammattaaq kanali ataaseq atugassanngortinneqassaaq nunaqarfigisami aallakaatitassianut kapitali 3 malillugu akuersissut naapertorlugu aallakaatinneqartunut siammarterneqartunulluunniit.

*Imm. 2.* Aallakaatitassiat ataatsimoortut neqeroorutigineqarpata:

- 1) ataatsimoortut tamarmik aallakaatitassianik imm. 1-imi aamma § 6-imi ilanngunneqartunik imaqaassapput, aammalu
- 2) ataatsimoortut ataasiinnaat, aallakaatitassianik imm. 1-imi aamma § 6-imi ilanngunneqartunik imaqartut imaluunniit aallakaatitassianik taakkuinnarnik aallakaatitassianillu allanik imaqartut pisiarinissaannut periarfissaqassaaq, taakkulu ima killilimmik akeqartillugit akilerneqassapput aallakaatitassiat ilassutaat, aallakaatitassiat ataatsimoortut katillugit akiinut killilimmik naleqassallutik.

*Imm. 3.* Imm. 2 naapertorlugu pisussaaffik atuutinngilaq aallakaatitassiat pineqartut antenneqarfinnik ataatsimoorussanik atuisunit allatut tigoorarneqarsinnaappata.

**§ 8.** Dekoderit aallakaatitanik ilisarnarunnaarsakkanik allanngortitsilluni tv-kkut aallakaatitanik fjernsynikkut takuteqqeriaannanngortitsissutit antennini ataatsimoorussani atorneqarsinnaaneritut maleruagassanik Naalakkersuisut aalajangiisinnaapput. Maleruagassani pissutsit makku pineqarsinnaapput:

- 1) Aallakaatitassianik neqerooruteqartut dekodekinik ataatsimoorussanik antenneqarfinni ataatsimoorussani atorneqartunik atuisinnaatitaanerit.
- 2) Aallakaatitassianik neqerooruteqartut namminerisamik dekodekiminnik atuisinnaatitaanerit.
- 3) Aallakaatitassianik neqerooruteqartut atuisunut toqqaannartumik akiliisitsisinnaanerit.

### **Kapitali 3**

#### *Aallakaatitsisinnaanermut akuersissut*

**§ 9.** Ingerlatseqatigiiffiit, peqatigiiffiit assigisaasaluunniit nuna tamakkerlugu aallakaatitassiornissamut qinnuteqarnerisa kingorna, Naalakkersuisut akuersissut tunniussinnaavaat (nuna tamakkerlugu aallakaatitsisinnaanermut akuersissut), tak. § 14.

*Imm. 2.* Naalakkersuisut nuna tamakkerlugu aallakaatitsisinnaanermut akuersissuteqarnerminnut atatillugu akuersissummut piumasaqaatinik aalajangiisinnaapput, tassani ilanngullugu piffissamik killiliisinnaaneq.

*Imm. 3.* Nuna tamakkerlugu aallakaatitsisinnaanermut akuersissummut piumasaqaatit atugassarititaasullu Naalakkersuisunit erseqqinnerusumik maleruagassiuunneqarsinnaapput.

**§ 10.** Naalakkersuisut ingerlatseqatigiiffiit, peqatigiiffiit assigisaasalu kiisalu kommunit qinnuteqaateqarnerisigut nunaqarfigisami aallakaatitsisinnaanermut akuersissuteqarfigisinnaavaat (nunaqarfigisami aallakaatitsisinnaanermut akuersissut) tak. § 13.

*Imm. 2.* Nunaqarfigisap iluani aallakaatitsisinnaanermut akuersissut kommunip pineqartup killeqarfisa iluanni aallakaatitsisinnaanermut akuersissutaavoq. Pissutsit immikkut ittut atuutsillugit kommunit sanilit iluanni aamma aallakaatitsisinnaaneq Naalakkersuisut aallakaatitsinissamut akuersissummik piginnittumut akuersissutigisinnaavaa.

*Imm. 3.* Aallakaatitassiamik sumiiffimmi allami aallakaatitsisinnaanermut akuersissummik piginnittumit

tassunga ilutigitillugu aallakaatinneqartumik aallakaatitsinissaq taamaallaat ajornanngilaq aallakaatitsinnaanermut akuersissutinik piginnittut tamanna isumaqatigiissutigippassuk, aammalu aallakaatitassiat ataatsikkut aallakaatinneqartut ataasiakkaaginnaappata piffissamilu killilimmi pillutik. *Imm. 4.* Naalakkersuisut sumiiffimmi aallakaatitsinnaanermut akuersissutaagallartumik tunniussinermikkut aallakaatitsinnaaneq akuersissutigisinnaavaat, aallakaatitassiat sumiiffiup iluani piffissap sivikitsup ingerlanerani pisunik ataasiakkaanik imaqarpata.

**§ 11.** Aallakaatitsinnaanermut akuersissutip piumasaqaatitaraa qinnuteqartup radiofrekvensit pillugit inatsisip Kalaallit Nunaanni atuutilersinneqarnera pillugu Kunngip peqqussutaa naapertorlugu radiofrekvensimik atuinissamut akuersissummik pisimanissaa.

*Imm. 2.* Aallakaatitsinnaanermut akuersissut piffissami, qaammatisiutit malillugit ukiup akuersissummik tunniussiffiusup sinnerani kiisalu qaammatisiutit malillugit ukiuni taassuma tulliini tallimani atuuttussatut tunniunneqassaaq, aatsaalli piffissamut sivikinnerusumut qinnuteqartoqarsimanngippat. Piffissaq aallakaatitsinnaanermut akuersissutip atuuffia naappat nutarterneqarnissaa qinnutigineqarsinnaavoq.

**§ 12.** Aallakaatitsinnaanermut akuersissummik qinnuteqaammi aallakaatitassiat suunerat nassuiarneqassaaq. Aallakaatitassiariniakkat suunera tamakkerlugit nassuiaammi ersersinneqassapput. Qinnuteqaat paasissutissanik makkuninnga imaqassaaq:

- 1) Qinnuteqaateqartup aqqa, najugaa, immaqalu oqarasuaatip telefaxillu normui kiisalu e-mail adresse.
- 2) Qinnuteqaateqartup IIN-normua aamma ingerlatsiveqarfittut normua.
- 3) Aallakaatitsinnaanermut akuersissutip qanoq siaruarsinnaatiginera.
- 4) Sumiiffik aallakaatitat anngummaffigisinnaasaat.
- 5) Aallakaatitsinnaanermut akuersissutip suussusia.
- 6) Piginnittunut, siulersugaanermut pisortaqarnermullu tunngasut.
- 7) Tusagassiuutitut ingerlassanik allanik piginnittuusimagaanni suleqateqaraanniluunniit.
- 8) Suleqatigiinnissamik pilersaaruteqartoqarnersoq.
- 9) Aallakaatitassiornerup ilusia imarisaalu, aamma oqaatsit agguataagaanerat.
- 10) Piffissat aallakaatitsiffiit.
- 11) Aallakaatitassiornerup aningaasalersugaanera.
- 12) Aallakaatitsinermut aallakaatitassiornermullu atortorissaarutit.
- 13) Radiofrekvensit pillugit inatsisip Kalaallit Nunaanni atuutilersinneqarnera pillugu peqqussut naapertorlugu radiofrekvensimik atuinissamut akuersissummik qinnuteqartup pigisaqarneranut uppnarsaat.

*Imm. 2.* Qinnuteqaat qinnuteqartumit atsiorneqarsimassaaq.

*Imm. 3.* Qinnuteqaateqartup akuersissummik tunineqareernerme kingorna paasissutissanut imm. 1-imi taaneqartunut allannguutaasinnaasut Naalakkersuisunut qaqugukkulluunniit nalunaarutigisassavai.

*Imm. 4.* Qinnuteqaateqarnermi periusissat pillugit maleruagassat aamma paasissutissanut ilassutissat Naalakkersuisut aalajangersinnaavaat.

**§ 13.** Ingerlatseqatigiiffiit, peqatigiiffiit assigisaasalu sumiiffiup aalajangersimasup iluani aallakaatitsinnaanerannut akuersissut piumasaqaatit makku naammassineqarsimappata tunniunneqassaaq:

- 1) Ingerlatseqatigiiffik, peqatigiiffik assigisaaluunniit Kalaallit Nunaanni angerlarsimaffeqassaaq.
  - 2) Ingerlatseqatigiiffup, peqatigiiffup assigisaataluunniit qinnuteqaammi uppersaatissanut piumasaqaatit naammassimassavai, tak. § 12, imm. 1.
  - 3) Aallakaatitassiat imarisaat inatsisinik malinnissorineqassapput.
  - 4) Radiofrekvensit pillugit inatsisip Kalaallit Nunaanni atuutilersinneqarnera pillugu peqqussut naapertorlugu frekvensimik atuinnissamut akuersissummut piumasaqaatit naammassineqarsimassapput.
- Imm. 2.* Kommunip aallakaatitsinnaaneranut akuersissut tunniunneqassaaq imm. 1-imi piumasaqaatit naammassineqarsimappata, aammalu kommunip aallakaatitassioarnissamini siunertarippagu innuttaasut soqutiginnittut aallakaatitsiornermut aallakaatitsinermullu atortorisarutunik atugassaqtinnissaat imaluunniit kommunip paasisutissanik ingerlatitsisarnissaa.

**§ 14.** Ingerlatseqatigiiffit, peqatigiiffit assigisaasalu nuna tamakkerlugu aallakaatitsinnaanerannut akuersissut tunniunneqarsinnaavoq piumasaqaatit imaattut naammassineqarsimappata:

- 1) § 13, imm. 1-imi piumasaqaatit naammassineqarsimappata.
- 2) Qinnuteqaateqartoq sumiiffup aalajangersimasup iluani tassunga ilutigittillugu aallakaatitsinnaaneranut akuersissummik tunineqarsimanngippat.
- 3) Qinnuteqaateqartup aningaasaqarniarnikkut tunngavia naammaginartuuppat.
- 4) Qinnuteqaateqartup aallakaatitsinissamut periarfissai naammaginartuuppat.
- 5) Aallakaatitat annertussutsimikkut imarisamikkullu isumaqarfigineqarpata kulturikkut paasisutissiinnikkullu innuttaasunut annertuumik tunniussisinnasut.

*Imm. 2.* Nuna tamakkerlugu aallakaatitsinnaaneranut akuersissummik kommunimut tunniussisoqarsinnaanngilaq.

**§ 15.** KNR-ip akuersissutillu piginnittuata aallakaatitsinerit tamarmik aallakaatitsiornermut akisussaasoqartinneqarnissaat isumagissavaat.

*Imm. 2.* KNR-ip akuersissutillu piginnittuata isumagissavaat aallakaatitassiat naammassineri tamaasa kia akisussaasimanerata nalunaarutigineqarnissaa, aammalu radioqarfiup tv-qarfiulluunniit suunera paasisitsissutigineqassaaq.

*Imm. 3.* KNR-ip akuersissutillu piginnittuata ingerlatami aalajangersakkat eqqortinneqarnissaat nakkutigissavaat.

**§ 16.** KNR-ip aamma aallakaatitsinnaaneranut akuersissummik piginnittup pisussaaffigaat upalungaarsimanissami pingaaruteqartunik innuttaasunut nalunaarutunik ingerlatitseqqiinissartik.

*Imm. 2.* KNR pisussaavoq inuiaqatigiinnut paasisutissat innuttaasunut soqutiginartut aallakaatinnissaannut.

*Imm. 3.* Imm. 1-imi 2-milu aallakaatinneqartussat taaneqartut qaqugu qanorlu aallakaatinneqartarnissaat pillugu Naalakkersuisut malittarisassanik aalajangiisinnaapput.

**§ 17.** KNR-ip aallakaatitsinissamullu akuersissummik piginnittup aallakaatitassiat tamaasa immiuttassavaat qaammatinilu pingasuni toqqortarisassallugit, maleruagassat Naalakkersuisunit aalajangerneqartut naapertorlugit. Aallakaatitsiorneq pillugu suliamik, pilerisaarutit aallakaatinneqarsimasut ilanngullugit, suliaqarnermut atatillugu Naalakkersuisut KNR aamma

aallakaatitsinissamut akuersissummik piginnittoq peqqusinnaavaat aallakaatitassianik immiussat tunniuteqqullugit. Aallakaatitsineq pillugu suliap suliarineqarnerata pisariaqartippagu KNR aamma aallakaatitsinissamut akuersissummik piginnittoq Naalakkersuisunit peqquneqarsinnaavoq aallakaatitassiat qaammatinit pingasunit sivisunerusumik toqqortareqqullugit.

**§ 18.** KNR-ip aamma sumiiffinni radioqarfiit tv-qarfillu, kapitali 5 naapertorlugu tapiissutinik pissarsisartut, piginneqqaartussaataaneq pillugu inatsisip periarfissiinera naapertorlugu innuttaasunut periarfissiissapput aallakaatitassianik toqqortaasiviminni misissuisinnaatillugit.

*Imm. 2.* Aallakaatitassianik toqqortaasivimmi pisortaq piumasaqarsinnaavoq misissuisinnaatitaanermut atatillugu aningaasartuutit matussutissaannik akiliuteqartitsinissamik.

**§ 19.** Naalakkersuisut sumiiffimmi aallakaatitsisinnaanermut akuersissut atuukkunnaarallartissinnaavaat atuukkunnaavitsissinnaalluguluunniit, akuersissutip piginnittuata § 13 naapertorlugu aallakaatitsisinnaanermut akuersissuteqarnissamut piumasaqaatit naammassisinnaajunnaarpagit, imaluunniit akuersissutini ukioq ataaseq sinnerlugu atorsimangippagu.

*Imm. 2.* Naalakkersuisut sumiiffimmi aallakaatitsisinnaanermut akuersissut

atuukkunnaarallartissinnaavaat atuukkunnaavitsissinnaalluguluunniit, akuersissutip piginnittuata

1) paragraffit 15-imiit 18-imut, § 17 naapertorlugu peqqussutit nalunaarutigineqartut imaluunniit aalajangersakkat taakku malillugit § 16, imm. 3-mi peqqussutigineqartut sumiginnarpagit,

2) § 12, imm. 3, unioqqutippagu,

3) pilerisaarisarnermut aningaasalersuinemullu maleruagassat unioqqutippagit, tak. kapitali 6,

4) Inatsisartut inatsisaat imaluunniit aalajangersakkat inatsit naapertorlugu aalajangersarneqarsimasut unioqqutippagit, unioqqutitsinerit annertuujuppata qasseeriarluniluunniit unioqqutitsineruppata,

5) ingerlatsinermini inatsisit allat annertuumik qasseeriarluniluunniit unioqqutippagit, imaluunniit

6) Radiofrekvensit pillugit inatsisip Kalaallit Nunaannut atuutilersinneqarnera naapertorlugu

akileraarutit, akitsuutit inatsisilluunniit malillugit akiliutaasussat akilersimangippagit.

*Imm. 3.* Imm. 2-mi taaneqartut pimatillugit nuna tamakkerlugu aallakaatitsisinnaanermut akuersissut

Naalakkersuisut atorunnaarallartissinnaavaat atorunnaavitsissinnaalluguluunniit. Atorunnaarsitsineq

pisinnaavortaaq akuersissutip piginnittuata aallakaatitsisinnaanermut akuersissummik tunineqarnerminut

piumasaqaatit naammassisinnaajunnaarpagit, tak. § 14-imi akuersissummik piumasaqaatit, imaluunniit

akuersissut ukioq ataaseq sinnerlugu atorneqarsimangippat.

## **Kapitali 4**

### **KNR**

#### *Siunertat suliasallu*

**§ 20.** KNR-ip siunertaraa Kalaallit Nunaanni innuttaasut tamakkerlugit aallakaatitassianik sullissinernillu tamatigoortunik nutaarsiassaqaartitsinermut, qaammarsaanermut, ilinniartitsinermut, eqqumiitsuliornermut aliikkusersuinemullu tunngasunik (innuttaasunik kiffartuussinermi pisussaaffit) tv radiolu aqqutigalugit pilersorneqarnissaat qulakkiissallugu. KNR-ittaaq aallakaatitassianik kiffartuussinernillu neqeroorutimini atorsinnaavai internet elektroniskimillu periarfissat allat.

*Imm. 2.* Aallakaatitassiat suliarilluagaallutillu, tamatigoortuullutillu assigiinngisitaarnissaat anguniarneqassaaq.

*Imm. 3.* KNR-ip aallakaatitassiai ataatsimut isigalugit Kalaallit Nunaanni inuiaqatigiit tamatigoortumik sammeneqarnerannik imaqqassapput, tassuunakkullu kulturikkut, inuunermik paasinninnikkut inuunermilu atugassarititaasutigit nunap immikkoortuini assigiinngitsuni atugaasut qanoq assigiinngisitaartiginerinek takussutissiissallutik.

*Imm. 4.* Nunap tamavimmi sammeneqarnissaa anguniarlugu KNR aallakaatitassiorartutullu allat, aamma sumiiffinni radioqarfiit tv-qarfillu, niuernerpalaartumik tunngaveqarlutik erseqqinnerusunik isumaqatigiissuteqassapput, taamaallutik aallakaatitassiorartut allat sumiiffimminniit KNR-ip nuna tamakkerlugu aallakaatitsineranut ilaatigit pilersuisunngorlutik.

*Imm. 5.* Aallakaatitassiat innuttaasut inuiaqatigiinnut tunngasunik pingaarutilinnik ilisimatinneqarnissaannik oqallinnissaanillu qulakkeerisuussapput.

*Imm. 6.* Aallakaatitassiatigit eqqumiitsuliornikkut kulturikkullu pilersitsisarnerup tamatiguussusia takussutissaqartinneqassaaq, aallakaatitassianilu inuiaat kalaallit kulturikkut soqutigisaasa amerlasuunut sammisuunerat ersersinneqassalluni. KNR-ip kalaallit eqqumiitsuliaannik kulturiannillu, aamma kalaallit kulturikkut kingornussaannik sulissutiginninniartutut ingerlatitseqqiiniartutullu inissisimanini pingaartilluinnassavaa.

*Imm. 7.* KNR-ip aallakaatitassiat meeqqanut inuusuttunullu immikkut sammitinneqartut isumagissavai.

*Imm. 8.* KNR-ip teknikkikkut periarfissat nutaat atorlugit isumaginiassavaa inuit innarluutillit aallakaatitassianik atuisinnaanerannik annertusaanissaaq, matumani aamma aallakaatitassiat inuiaqatigiinnut annertuumik soqutiginaatillit sapinngisamik allagartalersugaanissaa ussersornikkulluunniit nutserneqarnissaat anguniassallugu.

*Imm. 9.* KNR-ip innuttaasuni ikinnerussuteqarlutik kalaallit oqaasiinik ilitsoqqussaralugu oqaaseqartuunngitsut aallakaatitassiamini sapinngisamik annertunerpaamik isumagineqarnissaat qulakkiissavaa.

**§ 21.** KNR-ip aallakaatitassianik meeqqat ukiukinnerit timikkut, tarnikkut ileqqorissaarnikkulluunniit annertuumik ajoquserneqaatigisinnaasaannik, matumani pingaartumik aallakaatitassianik atoqatigiinnermut tunngasunik imaluunniit pissuteqanngivilluni nukersornermik imaqqartunik aallakaatitsisoqannginnissaa qulakkiissavaa. Ilanngutassiat sakkortuumik nukersornermik imaqqartut imaluunniit isiginnaagassat kanngunartunik imallit KNR-ip tusarnaartartunut isiginnaartartunullu mianersoqqussutigisassavai.

*Imm. 2.* KNR-ip aallakaatitassianik ammip qalipaataanik, arnaanermik/angutaanermik, upperisamik, sumit naggueqarnermik, nunamit suminngaanneernermik, politikikkut isummamik anguteqammilluunniit/arnaqammilluunniit atoqateqartartuunermik pissuteqartumik qinngarsuilernissamut aqqutissiueqataasinnaasunik aallakaatitsisoqannginnissaa qulakkiissavaa.

**§ 22.** Aallakaatitassianik aqqqissuussinermi pingaartilluinnarneqassapput naqisimaneqanngitsumik paasissutissiisinnaatitaaneq oqaaseqarsinnaatitaanerlu.

*Imm. 2.* Innuttaasut KNR aqqutigalugu paasissutissiisinnaanissamut periarfissinneqarnissaat KNR-ip qulakkiissavaa. KNR tassunga atatillugu aningaasartuutitut akiliuteqartitsilluni tusarnaartartut isiginnaartartullu nammineerlutik aallakaatitassiaminnik ineriartortitsineranni ikiorneqarnissaannik

aammalu tusarnaartartut isiginnaartartullu allatut KNR aqquutigalugu saqqummiussisinnaanissaannik neqeroorfigisinnaavai.

**§ 23.** Paasissutissiisarnermi tunngaveqarluartarnissaq nakerisarsiortannginnissarlu pingaartinneqassapput.

**§ 24.** KNR-ip oqaatsit pillugit erseqqissumik anguniagaqarnermigut kalaallit oqaasiisa pigiinnarneqarnissaat ineriartortinneqarnissaallu peqataaffigissavaa.

**§ 25.** KNR-ip nutaarsiassaqaqtitsinermik aallakaatitaasa annertunersaasa nammineerluni aallakaatitassiaanissaat KNR-ip qulakkiissavaa, tak. imm. 2.

*Imm. 2.* Nammineerluni aallakaatitassiat tassaapput radiukkut tv-kkullu aallakaatitassiat aaqqissorneqarsimasut KNR-ip nammineq suliarisimasai aamma aallakaatitassiat aaqqissorneqarsimasut KNR-ip pingaarnertut suliarinnittuulluni aallakaatitassiorartut allat aallakaatitassioqatigalugit suliarisimasai.

*Imm. 3.* KNR-ip nammineerluni aallakaatitassiaasa saniatigut aallakaatitassiat piniarnerisigut aallakaatitassiorartunillu allanit pisinikkut pissarsiarineqartassapput, tak. § 20, imm. 4. Aallakaatitassiat aamma KNR-ip aallakaatitassiorartullu allat aallakaatitassioqatigiinnerisigut suliarineqarsinnaapput.

**§ 26.** Innuttaasut aallakaatitsineq pillugu tusarniarneqartarnissaat KNR-ip qulakkiissavaa.

**§ 27.** Pilerisaarutit aallakaatitassiallu aningaasalersorneqartut kapitali 6-imi maleruagassat malillugit aallakaatitsinermi ilaatinneqarsinnaapput.

**§ 28.** Naalakkersuisut KNR-ilu naammassisassat pillugit isumaqatigiissusiussapput, tak. paragraffit 20-miit 26-mut (innuttaasunik kiffartuussinermut isumaqatigiissut) innuttaasunik kiffartuussinermi pisussaaffiit annertussusiinik qanorlu ittuunissaannik erseqqinnerusumik aalajangersaaffusumik. Naammassisassat pillugit isumaqatigiissut ukiut sisamakkaarlugit nutarterneqartassaaq, taamaattorli tak. § 57.

*Imm. 2.* Isumaqatigiissut minnerpaamik makkuninnga imaqassaaq:

- 1) KNR-ip innuttaasunik kiffartuussinermi ingerlatsinermi aallakaatitsinissamut periarfissaasa qassiuneri pillugit nassuiaatit.
- 2) KNR-ip piffissami isumaqatigiissuteqarfusumi ingerlatsinissamini aningaasaqarnikkut atugassarisaasut naatsorsuutigineqartut pillugit nassuiaatit.
- 3) Nammineerluni aallakaatitassiat ikinnerpaaffissaat nalunaarneqassaaq, tak. § 25, imm. 1 aamma 2.
- 4) Kalaallisut aallakaatitassiat allat ikinnerpaaffissaat nalunaarneqassaaq, tak. imm. 3.
- 5) Aallakaatitassiorartunit allanit pisiarineqartussat ikinnerpaaffissaat nalunaarneqassaaq, tak. § 20, imm. 4.
- 6) Aallakaatitassiat nutaarsiassat maannarpiarlu soqutiginarlut ikinnerpaaffissaat nalunaarneqassaaq, matumani aamma aallakaatitassiat nutaarsiassat maannarpiarlu soqutiginarlut nammineerluni aallakaatitassiat ikinnerpaaffissaat, tak. § 25.
- 7) Eqqumiitsuliorneq kulturilu pillugit aallakaatitassiat ikinnerpaaffissaat nalunaarneqassaaq, tak. § 20, imm. 6.



- 8) Aallakaatitassiat meeqqanut inuusuttunullu immikkut sammitinneqartut ikinnerpaaffissaat nalunaarneqassaaq, tak. § 20, imm. 7.
- 9) Aallakaatitassiat ilinniartitsinermut tunngasut ikinnerpaaffissaat nalunaarneqassaaq.
- 10) Aallakaatitassiat inuiaqatigiinni assigiinngitsunik oqaasilinnut sammitinneqartut aallakaatitanut assigiinngitsunut agguataarsimasut annertussusiat pillugu nassuiaatit, tak. § 20, imm. 9.
- 11) Ingerlatsinermi aningaasartuutit tamarmiusut ilaasa akissarsianut atorneqartussat annerpaaffissaat nalunaarneqassaaq.
- 12) KNR-ip sulisuinik ilinniartitseqqittarnerup ingerlaqqiffusumillu ilinniartitsinerup qanoq annertutiginissaannik nassuiaat.
- 13) KNR-ip allanik aallakaatitsisarneranik allanillu ingerlataqarneranik imarisaat qanorlu annertutigineri pillugit nassuiaatit, tak. § 29.
- Imm. 3.* Kalaallisut aallakaatitassianik allanik oqarnermi pineqarput radiukkut tv-kkullu aallakaatitassiat aaqqissorneqarsimasut, Kalaallit Nunaanni tv-qarfinnit radioqarfinnilluunniit allanit imaluunniit suliffeqarfinnit aallakaatitassiorartunit allanit Kalaallit Nunaanni angerlarsimaffeqartunit aallakaatitassiarineqarsimasut.
- Imm. 4.* Nammineerluni aallakaatitassiat, kalaallisut aallakaatitassiat allat, aallakaatitassiorartunit allanit pisiat ikinnerpaaffissaannik aallakaatitassiallu ataasiakkaat suunissaannik aalajangersaanermi aallakaateqqitat, pilerisaarutit aallakaatitassiallu allat aaqqissorneqarsimanngitsut ilaatinneqassanngillat.
- Imm. 5.* Naalakkersuisut innuttaasunik kiffartuussinermut isumaqatigiissutip imarisai pillugit erseqqinnerusunik maleruagassiorsinnaapput.
- Imm. 6.* Innuttaasunik kiffartuussinermut isumaqatigiissutip eqquutsinneqarnera pillugu ukiumoortumik nassuiaatit KNR-ip suliaralugillu Naalakkersuisunut nassiutissavai. Nassuiaatit nassiunneqarsimaffissaannut killiliussaq isumaqatigiissummi aalajangerneqartassaaq.
- Imm. 7.* Innuttaasunik kiffartuussinermut isumaqatigiissut taassumalu eqquutsinneqarnera pillugu nassuiaat tamanut saqqummiunneqartassapput.

**§ 29.** KNR allanik aallakaatitassiorsinnaatitaavoq, assersuutigalugu nunanut allanut aallakaatitsinermi aammalu aallakaatitassiornermi aallakaatitsinertigunnaangitsoq siammarterneqartussanik. KNR aallakaatitassiornermik allamik, kapitali 3 naapertorlugu akuersissut malillugu, ingerlataqarsinnaanngilaq. Naalakkersuisut aallakaatitassiorneq alla pillugu maleruagassiorsinnaapput.

*Imm. 2.* KNR aallakaatitassiornermik ingerlataqarnermut atatillugu imaluunniit ingerlatsiviup teknikkikkut atortuisa atorneqarnissaat, immikkut piginnaasaqarnerup il.il. iluaqutiginissaat siunertaralugit allanik ingerlataqarsinnaavoq. Pisariaqartitsineq naapertorlugu KNR sumiiffinni radioqarfinnik tv-qarfinnillu akiliisitsilluni ilitersuisassaaq.

*Imm. 3.* Naalakkersuisut ingerlataq alla pillugu maleruagassiorsinnaapput, matumani aamma ingerlatamik allamik suliaqarsinnaanermut killiliinerunissaq pillugu. Sumiiffinni radioqarfinnik tv-qarfinnillu KNR-ip ilitersuina pillugu akiliisitsinermi piumasaqaatit pillugit Naalakkersuisut aalajangersaasinnaapput, tak. imm. 2-mi oqaaseqatigiit aappaat.

*Imm. 4.* Akiliisitsisarluni tv KNR-ip allanik aallakaatitassiornerani aamma ingerlataani allami ilaasinnaanngilaq.

*Imm. 5.* Allanik aallakaatitassiorneq aamma ingerlataq alla unammilleqatigiinnermi atugassarititaasut tunngavigalugit ingerlanneqassaaq.

## *KNR-ip aaqqissuussaanera*

**§ 30.** KNR pisortat suliffeqarfigaat namminersortoq.

*Imm. 2.* KNR-ip suliani aalajangiineri suliffeqarfiup ingerlatsineranut tunngassuteqartut, aqutsinikkut oqartussaasunut allanut ingerlateqqinneqarsinnaanngillat. Sulianili tusagassiornermi ileqqorissaarnissaq aammalu akissuteqartarnissaq pillugit KNR-ip aalajangiineri tusagassiuisarnermi akisussaassuseqarneq pillugu inatsimmi maleruagassat naapertorlugit Tusagassiuisarnerit pillugit Aalajangiisartunut ingerlateqqinneqarsinnaapput.

**§ 31.** KNR siulersuisunit tallimanik ilaasortalimmit aqunneqassaaq, taakkunannga siulersuisut siulittaasuat ilaasortarluta ataaseq Naalakkersuisunit toqparneqartarlutik. Ilaasortat allat pingasut ukunannga innersuussisoqarneratigut Naalakkersuisunit toqparneqartarput:

- 1) Ilisimatusarfik, ilaasortassamik ataatsimik Kalaallit Nunaanni tusagassiornermut tunngatillugu tusagassiornermik annertuumik piginnaasalimmik innersuussisartoq.
- 2) Kalaallit Nunaanni eqqumiitsuliorlutik kulturimillu ingerlatsisut nuna tamakkerlugu kattuffiat ilaasortassamik ataatsimik eqqumiitsuliornermik kulturimillu annertuumik assigiinngiaartunillu ilisimasaqartumik innersuussisartoq.
- 3) Ilaasortaq ataaseq KNR-imi aalajangersimasumik atorfillit inassuteqarnerisigut.

*Imm. 2.* Ilaasortat 18-inik ukioqalereersimassapput, aammalu Inatsisartunut, Folketingimut kommunalbestyrelsinulluunniit ilaasortaassanatik taakkunungaluunniit qinigassanngortittuussaanatik. KNR-imi atorfillit siulersuisunut toqparneqarsinnaanngillat, imm. 1, nr. 3 malillugu inassuteqaataasimangikkunik.

*Imm. 3.* Siulersuisut tamarmiullutik tusagassiorneq, kultureqarneq, pisortatut aqutsineq inuussutissarsiornerlu paasisimasaqarfissavaat. Ilaasortaq KNR-imi aalajangersimasumik sulisut innersuussinerisigut toqparneqartoq pinnagu, ilaasortat ataasiakkaat pisortatut aqutsinermik inuussutissarsiornermillu ilisimasaqassapput aammalu uppersarsarneqarsinnaasumik suliamik ingerlatsineri piginnaasaqassallutik aammalu naleqquttumik ilinniagaqarsimassallutik, siulersuisuni pisortaqatigiinniluunniit taakkununga assingusuni peqataanikuunermikkut misilittagaqassallutik. Tamassuma saniatigut ilaasortat inassuteqaateqartoqartinnagit toqparneqartut aappaa aningaasaqarnermik ilisimasaqassaaq aappaalu sulisut pillugit suliassanik ilisimasaqassalluni.

*Imm. 4.* Siulersuisunut ilaasortat tamarmik, siulittaasoq kisiat pinnagu, ataasiakkaarlutik sinniisussaannik toqqaasoqassaaq, taannalu siulersuisunut ilaasortanngussaaq siulersuisunut ilaasortaq sinniisussaaffimmini tunuarpat, soraarsitaappat sivisuumilluunniit peqassanngippat. Sinniisussaq toqparneqarsimasooq siulersuisunut aalajangersimasumik ilaasortanngorpat sinniisussamik nutaamik toqqaasoqassaaq. Siulittaasoq tunuarpat soraarsitaappalluunniit Naalakkersuisut siulittaasumik nutaamik toqqaassapput.

*Imm. 5.* Siulersuisut akunnerminni siulittaasup tullianik toqqaassapput.

*Imm. 6.* Ilaasortat ukiuni sisamani atasussatut toqparneqassapput, toqqaagaaffimmili siullermi 1. august 2014-imiit 31. december 2018-imut. Ilaasortat toqparneqaaqqissinnaapput, kisiannili ataasiaannarlutik. Naalakkersuisut siulersuisunut ilaasortaq sinniisussarlunniit aalajangersimasumik ilaasortanngorsimasooq piffissap toqqaagaaffup ingerlanerani soraarsissinnaavaat, siulersuisutut akisussaaffini annertuumik

sumiginnarpagu, tak. § 32, imm. 1, allatulluunniit siulersuisuni issianissaminut imminut piukkunnarunnaarsissimappat.

*Imm. 7.* Siulersuisut akissarsiaqarnissaat aamma siulersuisunut ilaasortat akissaajaatiminnut, matumani ilanngullugit KNR-imik sullissinerminni angalanerminnut, nerisaqarnerminnut ineqarnerminnullu taarsiivigineqarnissaat pillugit Naalakkersuisut maleruagassiorsinnaapput.

**§ 32.** Siulersuisut KNR-ip siulersuisorai qullerpaat, KNR-illu ingerlatsinera pillugu aalajangersakkat malinneqarnissaannut akisussaanerpaajullutik. Tassunga atasumik siulersuisut akisussaaffigaat KNR-ip ingerlatsinera tamarmiusoq aamma innuttaasunik kiffartuussinermut isumaqatigiissutip eqquutsinneqarnissaa. Siulersuisut ulluinnarni aallakaatitassiorneq aallakaatitassallu ataasiakkaat sunniuteqarfigisussaangilaat, tak. § 34, imm. 1.

*Imm. 2.* Siulersuisut KNR-ip ingerlatsineranut maleruagassat nalinginnaasut aalajangersassavaat.

*Imm. 3.* Siulersuisut pisortamik atorfinitsitsisartuullutillu soraarsitsisartuupput.

*Imm. 4.* Naalakkersuisut KNR-imi maleruagassanik aalajangersaassapput.

**§ 33.** Naalakkersuisut Atuisut Siunnersuisoqatigiivini pilersitsissapput KNR-ip aallakaatitassiornermini anguniagai suliaassalu, inatsimmi aalajangersarneqarsimasut, KNR-ip qanoq ililluni pitsaanerpaamik isumaginnissinnaanerini KNR-ip siulersuisuinut siunnersuisussanik. Atuisut Siunnersuisoqatigiivi ukiut sisamakkaarlugit pilersinneqartassapput, siullermik 1. august 2014-imiit 31. december 2018-imut.

*Imm. 2.* Atuisut siunnersuisoqatigiiffianni qulingiluanik ilaasortaqaartumi ilaasortat ukuninnga innersuussisoqarneratigut Naalakkersuisunit toqqaarneqartassapput:

- 1) Meeqqat illersuisuat, ilaasortassamik ataatsimik innersuussisartog.
- 2) Oqaasileriffik, ilaasortassamik ataatsimik innersuussisartog.
- 3) Kalaallit Nunaanni eqqumiitsuliortut kulturimillu ingerlatsisut nuna tamakkerlugu kattuffiat ilaasortassamik ataatsimik innersuussisartog.
- 4) Innarluutillit nuna tamakkerlugu kattuffiat ilaasortassamik ataatsimik innersuussisartog.
- 5) Kalaallit Nunaanni tusarnaartartut isiginnaartartullu nuna tamakkerlugu kattuffiat ilaasortassamik ataatsimik innersuussisartog.
- 6) Radioqarfiit tv-qarfillu nuna tamakkerlugu kattuffiat ilaasortassamik ataatsimik innersuussisartog.
- 7) Ilisimatusarfik ilaasortassamik ataatsimik innersuussisartog.
- 8) Nunaqarfiit Nuna Tamakkerlugu Peqatigiiffiat ilaasortassamik ataatsimik innersuussisartog.
- 9) Kalaallit Nunaanni Utoqqaat Peqatigiiffiat ilaasortassamik ataatsimik innersuussisartog.

*Imm. 3.* Inassuteqarsinnaatitaasut imm. 2-mi taaneqartut arlaannit inassuteqartoqarsinnaanngippat Naalakkersuisut ilaasortassamik toqqaasinnaapput, toqqaasinnaatitaasup susassaqaqfiata iluani atuisut soqutigisaannik sinniisuusinnaasumik.

*Imm. 4.* Atuisut Siunnersuisoqatigiivini ilaasortat Kalaallit Nunaanni najugaqavissuussapput aammalu Inatsisartunut, kommunalbestyrelsimut Folketingimullu ilaasortaassanatik taakkunungaluunniit qinigassanngortittuussanatik, imaluunniit KNR-ip siulersuisuinut ilaasortaassanatik, kiisalu KNR-imi imaluunniit sumiiffinni radioqarfinni tv-qarfinnilu atorfiluussanatik.

*Imm. 5.* KNR Atuisut Siunnersuisoqatigiivinit allattuutitaqassaaq.

*Imm. 6.* Atuisut Siunnersuisoqatigiivisa suleriaasissaanni maleruagassat Naalakkersuisunit aalajangerneqassapput.

*Imm. 7.* Atuisut Siunnersuisoqatigiivnut ilaasortat siunnersuisoqatigiit ataatsimiinnissaannut peqataanarlutik najukkaminut aallartariaqartut ullormusiaqartinneqassapput angalanerminnullu akiliunneqarlutik maleruagassat Inatsisartunut, Naalakkersuisunut il.il. ilaasortat akiliunneqartarnerinik il.il. Inatsisartut Inatsisaanni kapitali 7-imiittut malillugit.

**§ 34.** Pisortaq ulluinnarni aallakaatitassanut akisussaasuvoq aammalu KNR-ip ulluinnarni allaffissornikkut aningaasatigullu aquunneqarneri isumagissallugit. Suliffeqarfiup malittarisassat tamatumunga tunngasut maleruagassallu siulersuisut aalajangersimasaat malillugit aquunneqarnissaa pisortap qulakkiissavaa.

*Imm. 2.* Pisortaq KNR-imi suleqataasunik atorfinitsitsisartuullunilu soraarsitsisartuuvuq.

**§ 35.** Atorfinitsitaanerni atugassarititaasut pissutsillu allat, atorfeqarnerup nalaani pissutsit soraarsitsinerillu eqqarsaatigalugit KNR-ip pisussaaffigaa aalajangersakkat Namminersorlutik Oqartussani atorfeqartunut qaqugukkulluunniit atuuttut malissallugit.

#### *KNR-ip aningaasalersugaanera*

**§ 36.** KNR-ip ingerlatsinera Nunatta karsianit tapiissutit, pilerisaarutit, aallakaatitassiat aningaasalersorneqartut suliatigullu allatigut isertitat aqutigalugit aningaasalersorneqarpoq. *Imm. 2.* Nunatta karsianit ukiumoortumik tapiissutit, ukiumut aningaasanut inatsisiliorfiup tullianut aningaasanut inatsisissap akuersissutigineqarneranut atatillugu Inatsisartunit aalajangersarneqartarput.

**§ 37.** KNR-ip siulersuisuisa ukiumut aningaasanut inatsisiliorfiup tullianut aningaasatigut missingersuutit Naalakkersuisunut ukiut tamaasa tunniuttassavaat, Naalakkersuisut piffissaliussaata nallertinnagu. Siunnersuutip imarissavai isertitassatut, ingerlatsinermut aningaasartuutissatut sanaartormullu aningaasartuutissatut naatsorsuutigisat missingersornerat kiisalu ukiut nikkinneranni aningaasaatit akiitsullu. Tamatuma peqatigisaanik ukiumi aningaasanut inatsisiliorfimmi taaneqartumi Nunatta karsiata tapiissutissaasa qanoq amerlatiginissaannik siunnersuut siulersuisut tunniuttassavaat.

*Imm. 2.* Siulersuisut missingersuutitut tamarmiusunut siunnersuummut ilanngullugu aallakaatitassiornermik allamik ingerlatsinissamut ingerlatsinermullu allamut immikkut missingersuutit, taassuma iluaniillutik ingerlatat allat tamaasa ataasiakkaarlugit immikkut missingersuusiorderi, tunniussaqaartassapput.

**§ 38.** KNR-ip ukioq naatsorsuusiorderia tassaavoq ukioq aningaasanut inatsisiliorfik. Namminersorlutik Oqartussani aningaasatigut missingersuusiordernermut, naatsorsuutininik nalunaarsuinermut naatsorsuutininilu saqqummiussarnermut malittarisassat qaqugukkulluunniit atuuttut KNR-ip malissavai.

*Imm. 2.* Ukiumoortumik naatsorsuutit piffissalersukkamilu naatsorsuutit allat imarissavaat KNR-ip pisortat sullissinerannik ingerlatsineranut immikkut naatsorsuutit. Allamik aallakaatitassiornerit allamilu ingerlatsinerit naatsorsuutaat tamaasa immikkut ataasiakkaarlugit nalunaarsorneqassapput.

*Imm. 3.* Naalakkersuisut innuttaasunik kiffartuussinermi ingerlatsinerup aallakaatitassiornermillu allamik ingerlatsinerup aamma allamik ingerlatsinerup missingersuutitigut naatsorsuutitigullu immikkoortinneqarnissaa pillugu maleruagassanik aalajangersaasinnaapput.

*Imm. 4.* Ukiumoortumik naatsorsuutit Namminersorlutik Oqartussat kukkunersuiisunit kukkunersiorneqartassapput.

*Imm. 5.* Piffissaliussaq Naalakkersuisunit aalajangerneqartoq tikitsinnagu, ukiumoortumik naatsorsuutit kukkunersiorneqarsimasut siulersuisunit akuerineqarsimasut kukkunersuiisut oqaaseqaataannik ilaqartillugit, siulersuisunit Naalakkersuisunut akuersissutigisassatut saqqummiunneqartassapput. Naalakkersuisut ukiumoortumik naatsorsuutit tamatuma kingorna Inatsisartunut ilisimatitsissutitut ingerlateqqissavaat.

*Imm. 6.* Siulersuisut naatsorsuutit Naalakkersuisunut saqqummiussinertik ilutigalugu naatsorsuutit tamanut saqqummiutissavaat.

## Kapitali 5

### *Sumiifinni radioqarfinnut tv-qarfinnullu tapiissutit*

**§ 39.** Naalakkersuisut tunngaviumik tapiissutit tapiiffigineqarnissamik qinnuteqaateqartoqartillugu aningaasanut inatsimmi tassunga aningaasaliissutigineqarsimasut periarfissiinerat malillugu sumiifinni radioqarfinnut tv-qarfinnullu piumasaqaatinik makkuninnga naammassinnittunut tunngaviumik tapiissuteqartassapput:

- 1) Aallakaatitsivik aallakaatitsinnaanermut akuersisummik atuuttumik peqassaaq.
- 2) Aallakaatitsiviup missingersuutit, naatsorsuutit kukkunersuiisoqarnerlu pillugit Namminersorlutik Oqartussat maleruagassiat eqquutsissavai.
- 3) Aallakaatitsiviup aallakaatitassiornermik ingerlatsinermut uppersarsaatit pillugit Namminersorlutik Oqartussat maleruagassiat eqquutsissavai, tak. § 43, imm. 1.
- 4) Aallakaatitsiviup sumiiffimmi innuttaasut sumiiffimmi nutaarsiassanik ilisimatittassavai.
- 5) Aallakaatitsiviup sumiiffimmi innuttaasut oqaaseqarnissamut periarfissaqartissavai.
- 6) Aallakaatitsiviup aallakaatitassiornermik ingerlatsinermini ilaatigut aallakaatissavai siammartissallugilluunniit aallakaatitassiat aqqissorneqarsimasut, aallakaatitsiviup nammineerluni suliai imaluunniit aallakaatitsiviup aallakaatitassiornermik ingerlatsivinnik allanik suleqateqarluni pingaarnertut aallakaatitassiorluunniit suliai (nammineerluni aallakaatitassiat). Aallakaatitseqqiinerit, ussassaarutit aallakaatitassiallu aqqissorneqarsimanngitsut nammineerluni aallakaatitassiatut isigineqanngillat.
- 7) Aallakaatitsiviup aallakaatitassianik meeqqat ukiukinnerit timikkut, tarnikkut ileqqorissaarnikkulluunniit ineriartornerminni annertuumik ajoquserneqaatigisinnaasaannik, matumani pingaartumik aallakaatitassianik atoqatigiinnermut tunngasunik imaluunniit pissuteqanngivilluni nukersornermik imaqtartut aallakaatitsisoqannginnissaa qulakkiissavaa. Ilangutassiat sakkortuumik nukersornermik imaqtartut imaluunniit isiginnaagassat kanngunartut pillugit aallakaatitsivik tusarnaartartunut isiginnaartartunullu mianersoqqusisassaaq.
- 8) Aallakaatitsiviup aallakaatitassianik ammip qalipaataanik, arnaanermik/angutaanermik, upperisamik, sumit naggueqarnermik, nunamit suminngaanneernermik, politikikkut isummanik anguteqammilluunniit/arnaqammilluunniit atoqateqartartuunermik pissuteqartumik qinngarsuilernissamut aqqutissiuqataasinnaasunik aallakaatitsisoqannginnissaa qulakkiissavaa.

*Imm. 2.* Piumasaqaatit imm. 1, nr. 4-miit 6-imut taaneqartut qanoq annertutiginissaasa ikinnerpaaffissaat pillugit maleruagassat Naalakkersuisunit aalajangersarneqarsinnaapput.

*Imm. 3.* Tapiissutit qaammatit pingasukkuutaartumik siumoortumik tunniunneqartassapput.

*Imm. 4.* Tapiissutininik pissarsisup aallakaatitassiornermik ingerlatsinermi allannguutit, imm. 1-imi piumasaqaatinik naammassinnikkunnaarnermik kinguneqartut, Naalakkersuisunut nalunaarutigisussaavai.

*Imm. 5.* Tapiissutininik pissarsisup aallakaatitsinermik ingerlataqarnini, piffissaliussaq Naalakkersuisunit aalajangerneqartoq nallertinnagu, ukiumoortumik naatsorsuutitigut kiisalu ukiumoortumik nalunaarutikkut nassuiaatigisassavaa.

**§ 40.** Naalakkersuisut aallakaatitassiornissamut tapiissutininik tapiiffigineqarnissamik qinnuteqaateqartoqartillugu aningaasanut inatsimmi tassunga aningaasaliissutigineqarsimasut periarfissiinerat malillugu sumiiffinni radioqarfinnut tv-qarfinnullu, tunngaviusumik tapiissutininik tapiiffigineqarnissamik piumasaqaatinik aamma nammineerluni aallakaatitassiat aalajangersimasut ikinnerpaaffissaannik piumasaqaatinik naammassinnittunut tapiissuteqartassapput, tak. imm. 2.

*Imm. 2.* Nammineerluni aallakaatitassiat qanoq ittut aallakaatitassiornermut tapiissutininik tapiiffigineqarsinnaaner at pillugu maleruagassat Naalakkersuisut aalajangersassavaat, aammalu aallakaatitassiornermut tapiissutit, matumani aamma tapiissutit annertussusiinik ataasiakkaanik pisinnaaner at pillugu maleruagassat, aalajangersarsinnaallugit.

*Imm. 3.* Aallakaatitassiornermut tapiissutit qaammatit pingasukkuutaartumik tunniunneqassapput qinnuteqaateqartup qaammatit pingasukkuutaap taassuma siuliani nammineerluni aallakaatitassiarisimasaasa annertussusii tunngavigalugit. Aallakaateqqitat, pilerisaarutit aallakaatitallu allat aaqqissorneqanngitsut nammineerluni aallakaatitassiat naatsorsorneqarneranni ilaassanngillat.

*Imm. 4.* Tapiissutininik pissarsisup nammineerluni aallakaatitassiornermik ingerlataqarnini piffissaliussaq Naalakkersuisunit aalajangerneqartoq nallertinnagu ukiumoortumik naatsorsuutitigut ukiumoortumillu nalunaarutikkut nassuiaatigisassavaa.

**§ 41.** Naalakkersuisut aningaasanut inatsimmi tassunga aningaasaliissutigineqarsimasut periarfissiinerat malillugu sumiiffinni radioqarfiit tv-qarfillu namminneq sulisuisa ilinniarteqqinneqartarnerannik ingerlaqqiffiusumillu ilinniartinneqarnerannik ineriartortitsiner at tapiissuteqartassapput.

**§ 42.** Tunngaviusumik tapiissutit tamakkiisumik ilaannakuusumilluunniit utertinneqarnissaat piumasarineqarsinnaavoq, tapiissutininik pissarsisoq:

- 1) tunngaviusumik tapiissutininik tapiiffigineqarnissamik qinnuteqaateqarnermini eqqunngitsunik paasissutissiisimappat,
- 2) aallakaatitassiornermik ingerlataqarnermi annertuumik allannguutit nalunaarutigisimanngippagit, tak. 39, imm. 4,
- 3) aallakaatitassiornermik ingerlataqarnini pillugu nassuiaammik piffissaliussatut aalajangersarneqartup iluani tunniussaqaarsimanngippat, tak. 39, imm. 5, imaluunniit
- 4) aallakaatitsinnaaner at akuersisummik tunineqarnissamut piumasaqaatinik naammassinnikkunnaarsimappat, tak. § 13.

*Imm. 2.* Aallakaatitassiornermut tapiissutit tamakkiisumik ilaannakuusumilluunniit utertinneqarnissaat piumasarineqarsinnaavoq, tapiissutininik pissarsisoq:

- 1) aallakaatitassiornermut tapiissutininik tapiiffigineqarnissamik qinnuteqaateqarnermini eqqunngitsunik paasissutissiisimappat,

2) nammineerluni aallakaatitassiornini pillugu nassuiaammik piffissaliussatut aalajangersarneqartup iluani tunniussaqaarsimanngippat, tak. 40, imm. 4, imaluunniit

3) aallakaatitsisinnanermut akuersisummik tunineqarnissamut piumasaqaatinik naammassinnikkunnaarsimappat, tak. § 13.

*Imm. 3.* Tunngaviusumik tapiissutit, aallakaatitassiornermut tapiissutit aamma nammineq sulisorisat ilinniarteqqinnerinut ingerlaqqiffiusumillu ilinniartinnerinut tapiissutit tamakkiisumik ilaannakuusumilluunniit utertinneqarnissaat piumasarineqarsinnaavoq, tapiissutininik pissarsisup tapiissutit aningaasaliissutigineqarneranni siunertaannit allaanerusunut atorsimappagit.

**§ 43.** Naalakkersuisut tunngaviusumik aamma aallakaatitassiornermut tapiissutit kiisalu sumiiffinni radioqarfiit tv-qarfiillu sulisuisa ilinniarteqqinnerinut ingerlaqqiffiusumillu ilinniartinnerinut tapiissutitut maleruagassiorsinnaapput, matumani ilanngullugit qinnuteqaat, naatsorsuutit utertitsinissarluni kiisalu tapiissutit ilaasa killilikkat allaffissornermut paasissutissiinermullu atornissaannik maleruagassat.

*Imm. 2.* Naalakkersuisut imm. 1-imi taaneqartut allaffissornikkut aqunneqarnerat tamakkiisumik ilaannakuusumilluunniit peqatigiiffimmut suliffeqarfimmulluunniit namminersortumut isumagisassanngortissinnaavaat, tassungalu tunngasunik maleruagassaliorlutik.

*Imm. 3.* Aningaasat tunngaviusumik aamma aallakaatitassiornermut tapiissutitut atunngitsoorneqartut ilinniartitseqqinnermut ingerlaqqiffiusumillu ilinniartitsinnermut tapiissutitut Naalakkersuisunit atorneqarsinnaapput, tak. § 41, imm. 1. Tapiissutininik allaffissornikkut aqutsineq allamut isumagisassanngortinneqarsimappat, tak. imm. 2, taamatut piginnaatinneqartup tunngaviusumik aamma aallakaatitassiornermut tapiissutit atunngitsoorneqartut ilinniartitseqqinnermut ingerlaqqiffiusumillu ilinniartitsinnermut tapiissutitut atorsinnaavai.

## Kapitali 6

### *Pilerisaarutit aallakaatitanillu aningaasalersuisarneq*

**§ 44.** Radiumi tv-milu pilerisaarutit imatut paasineqassapput:

1) Nioqqutissanut, kiffartuussinnermut suliffeqarfiillu iluanaarniarnissamik siunertaqartut kaammattuutit nersorinninnerillu, aallakaatitassiamut akiliuteqartoqarsimagaluarpalluunniit.

2) Aningaasarsiornikkut soqutigisaqaaqatigiit pillugit ilisimatitsissutit isummanillu saqqummiussinerit, assersuutigalugu inuussutissarsiuteqartut kattuffii, sulisitsisut kattuffii sulisartullu peqatigiiffii pillugit aammalu upperisarsiornikkut paasissutissiinerit politikikkulluunniit isummiussat, peqatigiit taakkua isumaasa siuarsarneqarnissaat kaammattuutigineqarnissaallu siunertaralugit, aallakaatitassiamut akiliuteqartoqarsimagaluarpalluunniit.

*Imm. 2.* Pilerisaarutit ilumut taamaattuunerat paasineqarsinnaasunngortinneqassaaq, taamaalilluni imarisaat saqqummiunneqariaasiallu aallakaatitanit nalinginnaasunit allaanerulluni.

**§ 45.** Tv-kkut, tekst-tv kisiat pinnagu, pilerisaarutit taamaallaat sivilunerpaamik minutsinik tallimanik sivilussusilinnut katiterlugit aallakaatinneqarsinnaapput. Taama katitikkat aallakaatitanut akunniliullugit inissinneqassapput.

*Imm. 2.* Radiukkut pilerisaarutit katitikkat KNR-imi taamaallaat sivilunerpaamik minutsinik tallimanik sivilussusilikkuutaamik aallakaatinneqarsinnaapput, aallakaatitanullu akunniliussatut inissinneqassallutik.

*Imm. 3.* Pilerisaarutini aallakaatitsinerit piffissap ullormut aallakaatitsiviusup 10 procentianit sivilisunerussanngillat.

**§ 46.** Nakorsaatit, tupat, immiaaqqat, viinnit imigassallu kimittuut pilerisaarutinit ilanngunneqaqqusaanngillat, taamaattorli tak. imm. 3.

*Imm. 2.* Taamattaaq upperisarsioqatigiit aamma politikikkut partiit, kattusseqatigiit kisimiillutillu qinigassanngortittut taakkuluunniit suleqatigiiffi tv-kkut pilerisaarutinit ilanngunneqaqqusaanngillat, taamaattorli tak. imm. 3.

*Imm. 3.* Naalakkersuisut imm. 1-imi 2-milu inerteqqutit avaqqunneqarsinnaaneri pillugit maleruagassiorsinnaapput.

**§ 47.** Pilerisaarutit aallakaatitassiornermi qanoq ittumik ilanngunneqartarnissaat Naalakkersuisut malittarisassiuussinnaavaat, matumani ilanngullugit pilerisaarutit suunerannik uppersaanaermut, inissisimanerannut, oqaasiinut imarisaannullu aammalu qanoq annertussuseqarnissaannut maleruagassat. Tamatumunga atatillugu pilerisaarutit meeqqanut sammitinneqartut inissinneqarnissaannut aamma nioqqutissanik meeqqanut tunngasunik pilerisaarutinit Naalakkersuisut malittarisassiuussiisnaapput.

**§ 48.** Aallakaatitassianut aningaasalersuisarnerup iluaniipput radiukkut tv-kkulluunniit aallakaatitassianut, tassunga ilaallutik tekst-tv-mi imaluunniit internetikkut elektroniskiusumilluunniit periarfissat allat atorlugit takutitanut toqqaannartumik toqqaannangitsumilluunniit tapiissutit sulluunniit, inuup ingerlatsiviulluunniit aallakaatitsinermik aallakaatitassiornermilluunniit ingerlataqartuunngitsup, atermi, ilisarnaatimi (logo), kinaassutsimi, ingerlatami nioqqutissiamiluunniit ilisimaneqarnerulernissaat siunertaralugu aningaasaliiffigisai.

*Imm. 2.* Aallakaatitap aningaasalersugaanera aallakaatitap aallartinnerani, naanerani aallakaatitalluunniit nalinginnaasumik unillatsiarfiini, imaluunniit taaneqartut arlaanni arlalinni, tapiissuteqartup aqqata ilisarnaataaluunniit (logo) nalunaarneqarneratigut ilisarnarsisinneqarsinnaasariaqarpoq. Tamakkuali aallakaatitami namminerimi ilanngunneqassanngillat. Taamaattorli tekst-tv-mi takutitani ataasiakkaani, imm. 1 naapertorlugu tapiiffiqeqartuni, tapiissuteqartup aqqa ilisarnaataaluunniit (logo) nalunaarneqassapput.

*Imm. 3.* Aallakaatitap aningaasalersorneqartup imarisaa qanorlu saqqummiunneqarnera tapiissuteqartumit imatut sunniuteqarfigineqassanngilaq, radioqarfiup tv-qarfulluunniit aallakaatitanut tunngatillugu aqqissuinermini nammineersinnaaneranut malunniutissalluni.

*Imm. 4.* Aallakaatitassiat inuup ingerlatsiviulluunniit immiaaqqanik, viinninik imigassanillu kimittuunik, tupanit nioqqutissianik, nakorsaatini nioqqutissanilluunniit pujortarnermut atatillugu atornerqarnerusartunik pingaarnertut ingerlataqartup aningaasalersugai aallakaatinneqaqqusaanngillat, taamaattorli tak. Imm. 8.

*Imm. 5.* Aallakaatitassiat upperisarsioqatigiinnit aamma politikikkut partiinit, kattusseqatigiinnit, kisimiillutik qinigassanngortittunit taakkuluunniit suleqatigiiffinit aningaasalersorneqartut aallakaatinneqaqqusaanngillat, taamaattorli tak. imm. 7 aamma 8.

*Imm. 6.* Aallakaatitassiat nutaarsiassanik maannarpiarlu soqutiginarutimik imallit aningaasalersorneqaqqusaanngillat.

*Imm. 7.* Radioqarfiit tv-qarfiillu tapiissutini pissarsineq ajortut imm. 5-imi pineqanngillat.



*Imm. 8.* Naalakkersuisut imm. 4-mi 5-imilu inerteqqutit avaqqunneqarsinnaaneri pillugit maleruagassiorsinnaapput.

**§ 49.** Aningaasalersuisarnerit aallakaatitassionermik ingerlatsinermi qanoq ittumik ilanngunneqarsinnaanerannut maleruagassat erseqqinnerusut Naalakkersuisunit aalajangersarneqarsinnaapput.

**§ 50.** Naalakkersuisut makkununga aalajangiisassapput:

- 1) Pilerisaarutit taamaattutut paasineqarsinnaanerat, inissiffissaat, oqaatsit atugassat pilerisaarutillu annertussusissaat, tak. §§ 44-45 aamma § 47.
- 2) Radiukkut tv-kkullu pilerisaarutit imarisaat, tak. § 46. Maleruagassanik unioqqutitsinerit Naalakkersuisunit uparuarneqarsinnaapput aammalu KNR imaluunniit aallakaatitsinissamut akuersisummik pigisaqartoq peqqusinnaallugu aalajangiineq avammut saqqummiutissagaa. Naalakkersuisut aalajangersinnaavaat tamanna qanoq iliorluni qanorlu isikkoqarluni saqqummiunneqassanersoq.
- 3) Pilerisaarutit aallakaatinneqartuni paasissutissanut piviusunut uparuaaneq. Uparuaasoqarsinnaanera aalajangiiffigineqassaaq paasissutissiinerit kinguneqarsinnaappata isiginnaartartut naalaartartulluunniit aningaasaqarnikkut innarlerneqarnerannik allatulluunniit sunniutilimmik innarlerneqarnerannik, paasissutissiissutillu eqqortuuneri qularnaarneqavissinnaanngippata. Naalakkersuisut aalajangernerminnik KNR imaluunniit aallakaatitsinissamut akuersisummik pigisaqartoq peqqusinnaavaat uparuaassut aallakaateqqullugu, uparuaassutip imaanut, ilusaanut inissiffissaanullu pissuserisassat erseqqinnerusut malillugit.
- 4) Aningaasaliisup kinaanerata aallakaatitallu aningaasaliiffigineqartut taamaattuunerisa paasineqarsinnaaneri, tak. §§ 48-49.

**§ 51.** Pilerisaarutit ilanngunneqartut aallakaatitassiallu aningaasaliiffigineqartut pillugit naammagittaalliutit ilanngunneqartup aallakaatinneqartulluunniit aallakaatinneqareerneratigut sapaatip akunneri sisamat qaangiutsinnagit Naalakkersuisunit tiguneqareersimassapput.

*Imm. 2.* Naalakkersuisut nammineerlutik suliaassanngortitsisinnaapput.

*Imm. 3.* Naalakkersuisut pilerisaarutit aallakaatitanillu aningaasalersuisarneq pillugit sulianik naammagittaalliteqartarneq pillugu maleruagassanik aalajangersaasinnaapput, tassunga ilaalluni naammagittaalliutip qanoq iluseqarnissaanik maleruagassat.

## **Kapitali 8**

### *Misileraanerit, nakkutilliineq pineqaatissiinerillu*

**§ 52.** Misileraanerit Inatsisartut inatsisaanni aalajangersakkat periarfissiinerat naapertorlugu ingerlanneqarnissaat Naalakkersuisut akuersissutigisinnaavaat.

**§ 53.** Dekoderinik imaluunniit dekoderinut atortunik allanik, radiukkut tv-kkulluunniit aallakaatitap ilisarnarunnaarsarneqarsimasup (kodet) imarisaanik pisortanit akuerisaanngitsumik pissarsinissamut atugassanik sananissaq, eqqussuinissaq, tuniniaanissaq, ikkussinissaq, peqarnissaq

allanngortitsinissarlunniit inerteqqutaapput. Atortut tamakkua takoqqusaarutiginnisaat allatullunniit pilerisaarutini ilanngunneqarnissaat inerteqqutaavoq.

**§ 54.** Naalakkersuisut nakkutigisaraat KNR-ip aamma radioqarfiit tv-qarfillu allat radiukkut tv-kkullu aallakaatitsinermut maleruagassanik eqquutsitsinersut. Inatsisartut inatsisaannik, Inatsisartut inatsisaat malillugu aalajangersakkanik akuersissuteqarnernilu malitassanik unioqqutitsinerit Naalakkersuisunit uparuarneqarsinnaapput.

*Imm. 2.* Naalakkersuisut nakkutilliinerminni atugassaminnik KNR aallakaatitsisinnanermullu akuersisummik pigisaqartoq piumasaqaateqarfigisinnaavaat ingerlatsiviup ingerlatsineranut paasissutissanik tunniusseqqullugu.

**§ 55.** Akiliisinneqarsinnaavoq

- 1) § 1-imut akerliusumik tusarnaagassanik isiginnaagassanillu aallakaatitassiortoq,
- 2) tusarnaagassanik isiginnaagassanillu § 4, imm. 1-imut imaluunniit § 4, imm. 2 aamma 3 kiisalu § 9, imm. 2-3 malillugit piumasaqaatinut akerliusunik, aallakaatitsissutit digitaliusut aqqutigalugit siammarterisoq,
- 3) tusarnaagassanik isiginnaagassanillu paragraffinut 5-imiit 7-imut akerliusumik antenneqarfiit ataatsimoorussat atorlugit siammarterisoq,
- 4) aningaasaliiffigineqartunit allaanerusumik tapiissutinik siunertanut allanut atuisoq,
- 5) § 50, nr. 1 aamma 2 malillugit aalajangikkanik sumiginnaasoq,
- 6) uparuaanissamik aalajangiinermik sumiginnaasoq, tak. § 50, nr. 3, imaluunniit
- 7) § 6-imik, § 7, imm. 1-imik 2-millu, § 12, imm. 3-mik, § 15, imm. 1-imik 2-millu, § 16, imm. 1-imik 2-millu §§ 17-18-inik, § 44, imm. 2-mik, § 45-mik, § 46 imm. 1-imik 2-millu, § 48, imm. 2-miit 6-imut, § 53-imik imaluunniit § 17 naapertorlugu peqqusummik unioqqutitsisoq.

*Imm. 2.* § 4, imm. 5-imi, § 8-mi, § 12-imi, imm. 4-mi, § 16-imi, imm. 3-mi, § 39, imm. 2-mi, § 40, imm. 2-mi, § 43, imm. 1-imi, § 47-mi aamma § 49-mi inassutinik unioqqutitsinerit akiliisussanngortitsissutaasinnaapput. Kalaallit Nunaanni Pinerluttulerinermi Inatsisip maleruagassai malillugit.

*Imm. 3.* Aktietigut ingerlatseqatigiiffiit, piginneqatigiilluni ingerlatseqatigiiffiit, peqatigiiffiit assigisaallunniit pillaammik akiliisussanngortinneqarsinnaapput. Kommuni kommunillunniit suleqatigiiffiat il.il. pillaammik akiliisussanngortinneqarsinnaapput.

*Imm. 4.* Inatsisartut Inatsisaat manna malillugu akiliisitsissutitigut isertitat Landskarsimut nakkassapput.

## Kapitali 9

*Atuutilersitsissutaasumik, ikaarsaarutaasumik atuukkunnaarsitsissutaasumillu aalajangersakkat*

**§ 56.** Inatsisartut Inatsisaat 1. august 2014-imiit atuutilissaaq, kisiannili inatsisip kapitalia 5 aatsaat 1. januar 2015-imi atuutilissalluni. Tassunga peqatigitillugu radiukkut tv-kkullu aallakaatitsisarneq pillugu Inatsisartut peqqussutaat nr. 6, 14. november 2004-meersoq atuukkunnaarsinneqassaaq, taamaattorli tak. imm. 2 aamma 3.

*Imm. 2.* Maleruagassat radiukkut tv-kkullu aallakaatitsisarneq pillugu Inatsisartut peqqussutaat nr. 6, 14. november 2004-meersoq naapertorlugu aalajangersarneqartut atuutiinnassapput, Inatsisartut inatsisaanni uani Inatsisartullunniit inatsisaanni allani maleruagassat malillugit taarserneqarnissamik atuukkunnaarsinneqarnissamillunniit tungaannut.

*Imm. 3. Inatsisip kapitalia 5 aatsaat 1. januar 2015-imiit atuutilissaaq. Kapitali 5-imi imm. 1-ip oqaaseqatigiivisa aappaani Inatsisartut peqqussutaat taaneqartoq pillugu atsaat atorunnaassapput 1. januar 2015-imiit.*

**§ 57.** Naalakkersuisut KNR-illu anguniagassat pillugit isumaqatigiissutissaat, tak. § 28, siullermeerluni nutarterneqassaaq Inatsisartut Inatsisaata uuma atuutilerneraniit piffissamut 1. januar 2016-imiit 31. december 2018-imut.

**§ 58.** Akuersissutit Inatsisartut Peqqussutaat nr. 6, 14. november 2004-meersoq malillugu sumiiffinni radioqarfinnut tv-qarfinnullu tunniunneqarsimasut, taannalu malillugu aalajangersagaasut, atuutiinnassapput akuersissutip atorunnaarfissaatut killiliussap tungaanut.

**§ 59.** Inatsisartut Inatsisaat Pituffimmi radiukkut tv-kkullu ingerlatsinernut sakkutooqarfimmik kiffartuussisuusumut atuutingilaq.

*Namminersorlutik Oqartussat, ulloq 8. juni 2014*

Aleqa Hammond

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut